

四庫全書

集部

欽定四庫全書

東坡全集卷九十八

宋 蘇軾 撰

頌一十七首

仁宗皇帝御書頌

并叙

天禧中仁宗皇帝在東宮故太傅鄧國張文懿公諱士
遜為太子諭德帝親書十二字以賜之曰寅亮天地弼
余一人又曰日新其德公之曾孫假承務郎臣欽臣以
屬翰林學士臣蘇軾為之頌二篇

其一曰天地不言付之人君明其德刑物自秋春人君無心屬之輔弼信其賞罰身為衡石惟天惟君與相為三孰能俛仰其德不慚於皇仁宗恭已無為以天為心以民為師其相鄧公履信思順天下頌之以退為進壽考百年以沒元身嗚呼休哉寅亮天地弼余一人

其一曰聖人如天時殺時生君子如水因物賦形天不違仁水不失平惟一故新惟新故一一故不流新故無數伊尹暨湯咸有一德周雖舊邦其命維新孰知此言

若出一人小臣稽首敬頌遺墨嗚呼休哉日新其德

英宗皇帝御書頌

嘉祐中太常博士周秉以文行選為諸王記室宗室之賢者多愛敬之時英宗皇帝龍潛藩邸嘗賜秉手書其家寶之臣過曲江見其孫袁州司法參軍超出以示臣謹稽首再拜為之頌曰

雲漢之章融為慶雲結為甘露融而不晞結而不散以燾冒其子孫

東坡羹頌

并引

東坡羹蓋東坡居士所煮菜羹也不用魚肉五味有自然之甘其法以菘若蔓菁若蘆菔若薺皆揉洗數過去辛苦汁先以生油少許塗釜緣及瓷盪下菜湯中入生米為糝及少生薑以油盪覆之不得觸觸則生油氣至熟不除其上置甑炊飯如常法既不可遽覆須生菜氣出盡乃覆之羹每沸涌遇油輒下又為盪所壓故終不得上不爾羹上薄飯則氣不得達而飯不熟矣飯熟羹

亦爛可食若無菜用瓜茄皆切破不揉洗入罨熟赤豆
與粳米半為糝餘如煮菜法應純道人將適廬山求其
法以遺山中好事者以頌問之

甘苦嘗從極處回鹹酸未必是鹽梅問師此箇天真味
根上來麼塵上來

桂酒頌

禮曰喪有疾飲酒食肉必有草木之滋焉薑桂之謂也
古者非喪食不徹薑桂楚辭曰奠桂酒兮椒漿是桂可

以為酒也本草桂有小毒而茵桂牡桂皆無毒大畧皆
主溫中利肝肺氣殺三蟲輕身堅骨養神發色使常如
童子療心腹冷疾為百藥先無所畏陶隱居云仙經服
三桂以葱涕合雲母蒸為水而孫思邈亦云久服可行
水上此輕身之效也吾謫居海上法當數飲酒以禦瘴
而嶺南無酒禁有隱者以桂酒方授吾釀成而玉色香
味超然非人間物也東坡先生曰酒天祿也其成壞美
惡世以兆主人之吉凶吾得此豈非天哉故為之頌以

遺後之有道而居夷者其法蓋刻石置之羅浮鐵橋之
下非忘世求道者莫至焉其詞曰

中原百國東南傾流膏輸液歸南溟祝融司方發其英

沐日浴月百寶生水娠黃金山空青丹砂晝一作晨暎一作珠

夜明百卉甘辛角芳馨梅檀沈水乃公卿大夫芝蘭士

蕙蘅桂君獨立冬鮮榮無所懾畏時靡爭釀為我醪淳

而清甘終不壞醉不醒輔安五神伐三彭肌膚渥丹身

毛輕冷然風飛罔水行誰其傳者疑方平教我常作醉

中醒

一作教我醒
醉醉時醒

油水頌

熙寧元年七月二十八日元叔設食嘉祐謁長老觀佛
牙趙郡蘇某為之頌曰

水在油中見火則起油水相搏水去油住湛然光明不
知有火在火能寶內外淨故若不經火油水同定非真
定故見火復起

豬肉頌

淨洗鑊少著水柴頭罨煙焰不起待他自熟莫催他火
候足時他自美黃州好豬肉價賤如泥土貴者不肯喫
貧者不解煮早晨起來打兩碗飽得自家君莫管

食豆粥頌

道人親煮豆粥大衆齊念般若老夫試挑一口已覺西
家作馬

荅子由頌

子由問黃檗長老疾云五蘊皆非四大空身心河嶽盡

圓融病根何處容他住日夜還將藥石攻

不知黃檗如何答老僧代云有病宜須著藥攻寒時火
燭熱時風病根既是無容處藥石還同四大空六月二
十日

禪戲頌

已熟之肉無復活理投在東坡無礙羹釜中有何不可
問天下禪和子且道是肉是素喫得是喫不得是大奇
大奇一盞羹勘破天下禪和子

荅孔子君頌

夢中投井入半而止出入不能本非佳處我今何為自
此作苦忽然夢覺身在牀上不知向來本元無井不應
復作出入住想道無深淺亦無遠近見物失空空未嘗
滅物去空現亦未嘗生應當正遠作如是觀

醉僧圖頌

人生得坐且穩坐劫劫地走覓什麼今年且局東禪屎
明年去拽西林磨

石恪畫維摩頌

我觀衆工一師人持一藥療一病風勞欲寒氣欲暖
肺肝胃腎更相克挾方儲藥如丘山卒無一藥堪施用
有大醫王拊掌笑謝遣衆工病隨愈問大醫王以何藥
還是衆工所用者我觀三十二菩薩各以意談不二門
而維摩詰默無語三十二義一時墮我觀此義亦不墮
維摩初不離是說譬如油蠟作燈燭不以火點終不明
忽見默然無語處三十二說皆光焰佛子若讀維摩經

當作是念為正念我觀維摩方丈室能受九百萬菩薩
三萬二千師子坐皆悉容受不迫迮又能分布一鉢飯
饜飽十方無量衆斷取妙喜佛世界如持鍼鋒一棗葉
云是菩薩不思議住大解脫神通力我觀石子一處士
麻鞋破帽露兩肘能使筆端出維摩神力又過維摩詰
若云此畫無實相毗耶城中亦非實佛子若見維摩像
應作此觀為正觀

阿彌陀佛頌

并叙

錢塘圓照律師普勸道俗歸命西方極樂世界阿彌陀
佛眉山蘇軾敬捨亡母蜀郡太君程氏遺留簪珥命工
胡錫采畫佛像以薦父母冥福謹再拜稽首而獻頌曰
佛以大圓覺充滿河沙界我以顛倒想出生死中云
何以一念得往生淨土我造無始業本從一念生既從
一念生還從一念滅生滅滅盡處則我與佛同如投水
海中如風中鼓索雖有大聖智亦不能分別願我先父
母與一切衆生在處為西方所遇皆極樂人人無量壽

無往亦無來

魚枕冠頌

瑩淨魚枕冠細觀初何物形氣偶相值忽然而為魚不幸遭網罟剖魚而得枕方其得枕時是枕非復魚湯火就模範巉然冠五岳方其為冠時是冠非復枕成壞無窮已究竟亦非冠假使未變壞送與無髮人簪導無所施是名為何物我觀此幻身已作露電觀而况身外物露電亦無有佛子慈閔故願受我此冠若見冠非冠即

知我非我五濁煩惱中清淨常歡喜

釋迦文佛頌

并引

端明殿學士兼翰林侍讀學士蘇軾為亡妻同安郡君
王氏閏之請奉議郎李公麟敬畫釋迦文佛及十大弟
子元祐八年十一月十一日設水陸道場供養軾拜手
稽首而作頌曰

我願世尊足指按地三千大千淨琉璃色其中衆生靡
不解脫如日出時眠者皆作如雷震時蟄者皆動同證

無上永不退轉

觀世音菩薩頌

并引

金陵崇因禪院長老宗襲自以衣鉢造觀世音像極相好之妙余南遷過而禱焉曰吾北歸當復過此而為之頌建中靖國元年五月日自海南歸至金陵乃作頌曰慈近乎仁悲近乎義忍近乎勇憂近乎智四者似之而卒非是有大圓覺平等無二無冤故仁無親故義無人故勇無我故智彼四雖近有作有止此四本無有取無

匱有二長者皆樂檀施其一大富千金日費其一甚貧
百錢而已我說二人等無有異吁觀世音淨聖大士徧
滿空界挈攜天地大解脫力非我敢議若其四無我亦
如此

十八大阿羅漢頌

蜀金水張氏畫十八大阿羅漢軾謫居儋耳得之民間
海南荒陋不類人世此畫何自至哉久逃空谷如見師
友乃命過躬易其裝標設燈塗香果以禮之張氏以畫

羅漢有名唐末蓋世擅其藝今成都僧敏行其玄孫也
梵相竒古學術淵博蜀人皆曰此羅漢化生其家也軾
外祖父程公少時游京師還遇蜀亂絕糧不能歸困卧
旅舍有僧十六人往見之曰我公之邑人也各以錢二
百貸之公以是得歸竟不知僧所在公曰此阿羅漢也
歲設大供四公年九十凡設二百餘供今軾雖不親覩
至人而困厄九死之餘烏言卉服之間獲此竒勝豈非
希濶之遇也哉乃各即其體像而窮其思致以為之頌

第一尊者結跏正坐蠻奴側立有鬼使者稽
顙于前侍者取其書通之頌曰

月明星稀孰在孰亡煌煌東方惟有啓明咨爾上座及
阿闍梨代佛出世惟大弟子

第二尊者合掌趺坐蠻奴捧牘于前老人發
之中有琉璃器貯舍利十數頌曰

佛無滅生通塞在人牆壁瓦礫誰非法身尊者斂手不
起于坐示有敬耳起心則那

第三尊者扶烏木養和正坐下有白沫猴獻
果侍者執盤受之頌曰

我非標人人莫吾識是雪衣者豈具眼隻方食知獻何
愧於猿為語柳子勿憎王孫

第四尊者側坐屈三指答胡人之問下有蠻
奴捧函童子戲捕龜者頌曰

彼問云何計數以對為三為七莫有知者雷動風行屈
信指間汝觀明月在我指端

第五尊者臨淵濤抱膝而坐神女出水中蠻
奴受其書頌曰

形與道一道無不在天宮鬼府奚往而礙婉彼竒女躍
于濤瀧神馬尻輿攝衣從之

第六尊者右手支頤左手拊楫師子顧視侍
者擇瓜而剖之頌曰

手拊雛猊目視瓜獻甘芳之意若達于面六塵並入心
亦徧知即此知者為大摩尼

第七尊者臨水側坐有龍出焉吐珠其手中
胡人持短錫杖蠻奴捧鉢而立頌曰

我以道眼為傳法宗爾以願力為護法龍道成願滿見
佛不作盡取玉函以昇思邈

第八尊者並膝而坐加肘其上侍者汲水過
前有神人涌出于地捧槃獻寶頌曰

爾以捨來我以慈受各獲其心寶則誰有視我如爾取
與則同我爾福德如四方空

第九尊者食已襪鉢持數珠誦咒而坐下有童子構火具茶又有理筒注水蓮池中者頌

曰

飯食已畢襪鉢而坐童子若供吹籥發火我作佛事淵乎妙哉空山無人水流花開

第十尊者執經正坐有仙人侍女焚香于前
頌曰

飛仙玉潔侍女雲眇稽首炷香敢問至道我道大同有

覺無脩豈不長生非我所求

第十一尊者趺坐焚香侍者拱手胡人捧函
而立頌曰

前聖後聖相喻以言口如布穀而意莫傳鼻觀寂如諸
根自剏孰知此香一炷千偈

第十二尊者正坐入定枯木中其神騰出于
上有大蟒出其下頌曰

默坐者形空飛者神二俱非是孰為此身佛子何為懷

毒不已願解此相問誰縛爾

第十三尊者倚杖垂足側坐侍者捧函而立
有虎過前有童子怖匿而竊窺之頌曰

是與我同不噬其妃一念之差墮此髻鬚導師悲愍為
爾輦歎以爾猛烈復性不難

第十四尊者持鈴杵正坐誦咒侍者整衣于
右胡人橫短錫跪坐于左有虻一角若仰訴
者頌曰

彼髯而虬長跪自言特角亦來身移怨存以無言音誦
無說法風止火滅無相仇者

第十五尊者鬚眉皆白袖手趺坐胡人拜伏
于前蠻奴手持拄杖侍者合掌而立頌曰

聞法最先事佛亦久耄然衆中是大長老薪水井白老
矣不能摧伏魔軍不戰而勝

第十六尊者橫如意趺坐下有童子發香篆
侍者注水花盆中頌曰

盆花浮紅篆烟繚青無問無答如意自橫點瑟既希昭
琴不鼓此間有曲可歌可舞

第十七尊者臨水側坐仰觀飛鶴其一既下
集矣侍者以手拊之有童子提竹籃取果實
投水中頌曰

引之浩茫與鶴皆翔藏之幽深與魚皆沉大阿羅漢入
佛三昧俯仰之間再拊海外

第十八尊者植拂支頤瞪目而坐下有二童

子破石榴以獻頌曰

植拂支頤寂然跏趺尊者所游物之初耶聞之於佛及
吾子思名不用處是未發時

跋尾

佛滅度後閻浮提衆生剛狠自用莫肯信入故諸賢聖
皆隱不現獨以像設遺言提引未悟而峨眉五臺廬山
天台猶出光景變異使人了然見之軼家藏十六羅漢
像每設茶供則化為白乳或凝為雪花桃李芍藥僅可

指名或云羅漢慈悲深重急於接物故多現神變儻其然乎今於海南得此十八羅漢像以授子由弟使以時修敬遇夫婦生日輒設供以祈年集福并以前所作頌寄之子由以二月二十日生其婦德陽郡夫人史氏以十一月十七日生是歲中元日題

箴一首

東交門箴

漢武帝為寶太主置酒宣室使謁者引納董偃東方朔

以謂有斬罪三安得入宣室上為更置酒北宮而引偃
從東司馬門而前更無譏焉作東交門箴

上所好惡民實趨之風俗厚薄君實驅之道之以正民
俗罔中唱之以淫實煩有從帝于館陶在齊文姜矧董
外人于國亂常既不能戮反以為好予飲予燕宣室是
傲偉彼臣朔辟戟趨陛鬻拳是效剛而有禮改館徹饌
北宮東門雖曰從諫東交實存維藩維戚禮法遂恣延
及齊民惟上所使昔在季孫賞盜以邑魯遂多盜而罔

敢詰矧茲王宮姦人是納昭示來世有慙斯闔費也揚
解社舉得名殿檻勿輯直臣是旌人孰無過過而勿貳
宣室東交實同名異

疏二首

請淨慈法涌禪師入都疏

京師禪學之盛發於本秀二公本既還山秀復入寂駙
馬都尉張君子來聘法涌繼揚宗風東坡居士適在錢
塘實為敦勸太丘道廣廣則難周仲舉性峻峻則少通

法涌童子畫沙已具佛智維摩無語猶涉二門雖吾先
師不異是說質之孔孟蓋有成言不為穿窬仁義不可
勝用博施濟衆堯舜其猶病諸我願法涌廣大慈悲印
宗仁得仁之侶深巖峻峙訶未證謂證之人本自不然
伏惟珍重

重請戒長老住石塔疏

大士未曾說法誰作金毛之聲衆生各自開堂何關石
塔之事去無作相住亦隨緣長老戒公開不二門施無

盡藏念西湖之久別本是偶然為東坡而少留無不可者一時作禮重聽白椎渡口船回依舊雲山之色秋來雨過一新鐘鼓之音

青詞七首

鳳翔醮土火星青詞

嗚呼天之保佑下民罔不至所資以生罔不蕃育民既不知德天亦維不勅乃朝夕戕取以厚厥躬天既不我咎乃不恭畏于神祇不脩勅厥心驕淫矜夸以干上帝

威命帝用不赦丕降罪疾于下則惟雨暘常以訖我黍稷禾菽麻麥我民用蕩析隕越天亦終哀矜其忍翦棄其命罔子遺今秦民既不獲于秋乃十旬弗雨曰其尚克有夏走于山川鬼神亦罔不至既不獲乃曰維熒惑鎮星次于井秦民其亦應受多罪茲用即于齋宮為壇位以與百姓請命嗚呼其庶幾哀之俾克有夏亦克執厥秋民今其粟粟朝不謀一作能夕

徐州祈雨青詞

河失故道遺惠及於東方徐居下流受害甲於他郡田
廬漂蕩父子流離飢寒頓仆於溝坑盜賊充盈於犴獄
人窮計迫理極詞危望二麥之一登救饑民於垂死而
天未悔禍歲仍大荒水未落而旱已成冬無雪而春不
雨烟塵蓬勃草木焦枯今者麥已過期獲不償種禾未
入土憂及明年臣等恭循舊章並走羣望意水旱之有
數非鬼神之得專是用稽首告哀籲天請命若其賦政
多僻以謫見于陰陽事神不恭以獲戾于上下臣實有

罪罰其敢辭小民無知大命近止願下雷霆之詔分勅
山川之神朝躋寸雲暮洽千里使歲中熟則民猶小康
諸宮觀等處祈雨青詞

饑饉之患民流者期年吁嗟之求詞窮於是日仰惟至
道之助推廣上天之仁名呼羣龍時賜霈澤罔以不德
而廢其言

醮北嶽青詞

少年出仕本有志於救人晚節倦遊了無心於交物養

冥多罪憂患再罹飄然流行靡所歸宿仰止高真之馭
降於喬嶽之陽稽首投誠齋心悔過庶一念之清淨洗
千劫之塵勞妙用無方先解纏身之網靈光所燭幸逢
出世之師誓此餘生永依至道

醮上帝青詞三首

臣聞報應如響天無妄降之災恐懼自修人有可延之
壽敢傾微懇仰瀆大鈞臣兩遇禍災皆由滿溢早竊人
間之美仕多收天下之虛名濫取三科叨臨八郡少年

多欲沉湎以自殘褊性不容剛愎而好勝積為咎厲邁
此艱屯臣今稽首投誠洗心歸命誓除驕慢永斷貪嗔
幸不死於嶺南得退歸於林下少駐桑榆之暮景庶幾
松柏之後凋

又

代子
駿

切以洪覆至神固不期於報謝羣生多故實有賴於祈
禳切輸悃幅之私仰瀆高明之聽伏念某遭逢盛際蒙
被餘恩賦形宇宙之中殆將四紀竊祿江淮之上幾及

二年身雖曲盡於勤勞事豈舉無於過誤慮愆尤之浸
廣恐譴責之陰加粵自先朝當聿修於醮事及茲歲暮
輒謹按於科文祇建壇場肅陳香火伏願上真保佑列
聖扶持宦路亨通無謗傷之橫至私門安燕絕災釁之
潛生福建親闈慶延子舍

又代陸
和叔

伏聞妙道淵微非塵凡之可測圓穹杳邈有誠信之能
通輒伸悃幅之私上瀆高明之聽切念臣叨司三局從

事六官勤勞更歷於歲終脩省每恭於夙夜昨於正旦
嘗啓願心許大醮之祈禳乞靈庇之保護今逢誕日恭
按科文集道侶於壇場頂眸容於香火仰回聖馭曲享
清羞伏望上帝垂慈列聖降祐延偏親之壽考茂合族
之禧祥三考書成祈有更代之慶百神來相俾無災滯
之虞

疏文一十四首

興龍節功德疏文五首

右伏以上帝垂休真人誕降乾坤合契永為慶喜之辰
草木何知舉有欣榮之意矧惟遭遇獲侍清閒不緣梵
釋之因曷致涓塵之効伏願皇帝陛下受天之祿如川
方增奄有漢唐之封疆倍萬唐虞之壽考永均介福下
及函生

右伏以三王之樂固常與天下同四海之心莫不欲吾
君壽以茲願力叩彼佛乘仰惟無礙之慈副我必從之
欲伏願皇帝陛下配天而治如日之中安樂延年錫帝

齡之無筭寅畏享福過周歷以常新下及海隅同躋壽域

右伏以上帝立子將開太平之基下民歸仁自享延鴻之壽不假龍天之會曷旌臣子之心伏願皇帝陛下受祿無疆如川方至五兵不用同萬國之車書多士克生達四門之耳目永均介福普及函生

右伏以候嘉平之臘協氣充流歌長發之祥羣心踊躍華夷交慶草木增榮矧惟扈從之私獲在封疆之守敢

緣願力祇叩佛乘仰惟無礙之慈副我必從之欲伏願
皇帝陛下配天而治如日之中安樂延年錫帝齡之無
算寅畏享福過周歷以常新下及海隅同躋壽域

右伏以瑞乙來翔共紀生商之兆羣龍下集適同浴佛
之辰爰崇勝因以薦多祉伏願皇帝陛下立民之極先
天不違福如南山之不騫壽等西方之無量集寧海宇
永庇神天

坤成節功德疏文七首

右伏以功存社稷慶鍾高密之門澤及本枝天昨大任
之德候西風之協應占南極之嘉祥特啓真壇仰祈睿
算順帝之則固不待於禱求應地無疆亦難忘於祝頌
臣無任懇禱激切之至

右伏以慈儉之化無得而名保佑之功云何可報仰首
雲天之望傾心草木之微至哉坤元德既超於載籍養
以天下福宜冠於古今敢冀神休永為民極臣無任
右伏以寶儉與慈地無私載履信思順天且不違眷惟

江海之邦日蒙雨露之施民心所祝神聽必臨祈萬壽於無疆庶羣生之永賴臣無任

右伏以上帝儲休遺寶龜而降聖羣方仰德執瑞玉以來賓恪修臣子之誠虔奉天人之禱供精蒲塞文演貝多致海衆之莊嚴廣潮音之清淨勝因所集睿算日隆恭惟太皇太后陛下伏願大安大榮永對無窮之問時萬時億獨觀有道之長臣無任

右伏以玉勝發祥金行正候合天人之寶運實華夏之

昌辰已格鴻休猶資善禱展祇園之淨供發秘藏之真
乘庶假良因益崇睿算恭惟太皇太后陛下伏願威神
有截盡龍象以瞻依壽考無疆等乾坤之久大臣無任
右伏以神聖在御天地無可報之恩臣子何知佛老有
歸誠之法敢緣淨供仰祝遐齡太皇太后陛下伏願日
照月臨海涵岳峙帝簡好生之德錫壽無疆民銜既富
之仁保邦何極臣無任

右伏以星火西流方歲功之平秩夕月既望昭陰德之

致隆凡我有生歸誠茲日佛身充滿天監聰明太皇太后陛下伏願享德三靈齊光兩曜坐俟雲來之養受祿無疆屢觀甲子之周與民同樂臣無任

太皇太后本命歲功德疏文

右伏以天人合契輔成繼照之明歲月襲祥允協重坤之象肇臨正旦寅奉德音盡海宇之無疆集緇黃而來會旁推舜孝仰叩佛乘伏願太皇太后陛下下順民心仰膺天保配西方之無量與南山而不傾豈獨五音六

律之旋再臨此歲將推三統九會之復以下其年永與
函生共茲介福謹疏

景靈宮祈福道場功德疏文

右伏以仁心浹物自然憂樂之同孝治格天宜爾感通
之速庶殫精懇仰叩上真恭惟太皇太后陛下保佑聖
神勤勞夙夜偶倦東朝之御未復太官之常爰即珠庭
大陳妙供法音上達雖有假於雲章民志下同自不勞
於秘祝願膺勿藥之喜永保無疆之休

東坡全集卷九十八

欽定四庫全書

東坡全集卷九十九

宋 蘇軾 撰

祝文六十八首

禱雨礮溪祝文

歲秋矣物之幾成者待雨而已穡者已秀待雨而實三日不雨則穡者不實矣莢者已孕待雨而秀五日不雨則莢者不秀矣野有餘土室有閒民待雨而耕且種七日不雨則餘土不耕閒民不種矣穡者不實莢者不秀

餘土不耕而閒民不種則守土之臣將有不任職之誅而山川鬼神將乏其祀茲用不敢寧居齋戒擇日並走羣望而精誠不散神不顧答吏民無所請命聞之曰號有周文武之師大公其可以病告乃用大禘之禮禱而不祠穀梁子曰古之神人有應上公者通乎陰陽君親帥諸大夫道之而以請焉夫生而為上公沒而為神人非公其誰當之詩曰維師尚父時維鷹揚涼彼武王肆伐大商會朝清明公之仁且勇計其神靈無所不能為

也吏民既以雨望公公亦當任其責敢布腹心公實圖
之尚饗

鳳翔太白山祈雨祝文

維西方挺特英偉之氣結而為此山惟山之陰威潤澤
之氣又聚而為湫潭餅罌罐勺可以雨天下而況於一
方乎乃者自冬徂春雨雪不至西民之所恃以為生者
麥禾而已今旬不雨即為凶歲民食不繼盜賊且起豈
惟守土之臣所任以為憂亦非神之所當安坐而熟視

也聖天子在上凡所以懷柔之禮莫不備至下至於愚夫小民奔走畏事者亦豈有他哉凡皆以為今日也神其盍亦鑒之上以無負聖天子之意下以無失愚夫小民之望尚饗

告封太白山明應公祝文

天作山川以鎮四方俾食于民以雨以暘惟公聰明能率其職民以早告應不踰夕帝謂守臣予嘉乃功惟新爵號往耀其躬在唐天寶亦賜今爵時惟術士探符訪

藥謂為公榮實為公差中原顛覆神不顧救今皇神聖
惟民是憂民既飽溢皇無禱求袞衣煌煌赤烏繡裳捨
舊即新以佑我民尚饗

祈雨龍祠祝文

杭州

神食于民吏食于君各思乃事食則無愧吏事農桑神
事雨暘匪農不力雨則時嗇名呼風霆來會我庭一勺
之水膚寸千里尚饗

祈雨吳山祝文

杭之為邦山澤相半十日之雨則病水一月不雨則病旱故水旱之請黷神為甚今者止雨之禱未能踰月又以旱告矣吏以不德為愧神以不倦為德願終其賜俾克有秋尚饗

祈晴風伯祝文

維神開闔陰陽鼓舞萬類行巽之權直箕之次陰淫為霖神能散之下土墊滂神能暎之發軫西北弭節東南風反雨霽神亦不慙尚饗

祈晴雨師祝文

天以風雨寒暑付於神亦如人君之設官置吏以治刑
政也人君未嘗不欲民之安天亦何嘗不欲歲之豐乎
刑政之失中民惟吏之怨雨暘之不時民亦不能無望
於神也今淫雨彌月農工告窮歲之豐凶決於朝夕而
並走羣望莫肯顧答維天之所以畀於神神之所以食
於民者庶其在此尚率厥職俾克有秋尚饗

祈晴吳山祝文

歲既大熟惟神之賜害於垂成匪神之意築場為塗臥
穉生耳農泣于野其忍安視生為楚英沒為吳豪烈氣
不泯視此海濤反雨為暘何足告勞有潔斯醴匪神孰
號尚饗

奉詔禱雨諸廟祝文

噫嗟艱歲胡閔斯雨念我東南舖饗中土迎秋餞伏農
不再舉有事郊廟萬方畢助漕溝絕流庭實未旅下書
哀痛超軼堯禹矧茲守臣廢食悼懼民之禍福間不容

縷今不愆救後訴無所天高莫謁神或可籲尚饗

禱雨社神祝文

噫我侯社我民所恃祭于北墉答陰之義陽亢不反自
春徂秋迄冬不雨嗣歲之憂吏民嗷嗷謹以病告錫之
雨雪民敢無報尚饗

禱雨后土祝文

神食于社蓋數千年更歷聖王訖莫能遷源深流遠愛
民宜厚雨不時應亦神之疚社稷惟神我神惟人去我

不遠宜軫我民尚饗

禱雨稷神祝文

農民所病春夏之際舊穀告窮新穀未穞其間有麥
如暘得涼如行千里弛擔得漿今神何心茲此雨雪敢
求其他尚憫此麥尚饗

禱雨后稷祝文

維神之生稼穡是力瘡身為民尚莫顧惜矧今在天與
天同功名呼風雲孰敢不從豈惟農田井竭無水我求

於神亦云亟矣尚饗

祭常山祝文五首 密州

洪惟上帝以斯民屬於山川羣望亦如天子以斯民屬於守土之臣惟吏與神其職惟通殄民廢職其咎惟均哀我邦人遭此凶旱流殍之餘其命如髮而飛蝗流毒遺種布野使其變躍飛騰則桑柘麥禾舉罹其災民其罔有子遺吏將獲罪神且乏祀茲用慄慄危懼謹以四月初吉齋居蔬食至于閏月辛丑若時雨沾洽蝗不能

生當與吏民躬執牲幣以答神休嗚呼我州之望不在
神乎父老謂神求無不獲克有常德以名茲山其可不
答以愧此名若曰歲之豐凶在天非神之所得專吏將
亦曰民之休戚在朝廷我何知焉則誰任其責矣上帝
與吾君愛民之心一也凡吏之可以請于朝者既不敢
不盡則神之可以謁于帝者宜無所不為尚饗

又

我我茲山望我東國為帝司雨涵濡百物自我再禱應

不旋轂迨茲有秋歲得中熟嗟此薄禮曷稱其德陶匠
並作新其楹桷豈以為報民苟不忤歲云徂矣辭麥未
殖嗣歲之憂既謝且謁惠然雨我以永休烈尚饗

又

比年以來蝗旱相屬中民以上舉無歲蓄量日計口斂
不待熟秋田未終引領新穀如行遠道百里一宿苟無
舍館行李夜哭有秋不雨霜露殺殺黃糜黑黍不滿困
麓麥田未耕狼顧相目道之云遠飢腸誰續五日不雨

民在坑谷猗嗟我侯靈應響速帝用嘉之惟新命服
祈而不獲厥愆在僕洗心祇載敢辭屢瀆庶哀斯民朝
夕濡足尚饗

又

天子有命閔茲旱暵俾我守臣並走羣望惟神聰明慈
惠求無不獲既再禱矣雖嘗一雨不及膚寸吏實不德
不足以蒙神之休導迎善氣以致甘澤洪惟聖天子之
意其可不答而飢羸之民將轉于溝壑其可不一救之

瀆神之罰吏其敢辭尚饗

又

熙寧九年七月某日詔封常山神為潤民侯十月某日
具位蘇軾謹以清酌少牢之奠昭告于侯之廟曰嗚呼
旱蝗之為虐也三年於茲矣東南至于江海西北被于
河漢饑饉疾疫靡有遺矣我瞻四方大川喬嶽食于斯
民者甚衆而受寵於吾君者可謂巍巍矣訴之而必聞
求之而必獲思我農夫而救其災沴不為倏雲驟雨苟

以應禱之虛名而有膏澤積潤可以及民之實效卓然如侯者幾希矣凡天子之爵命有德而致之則為榮無功而享之則為辱今侯澤此一郡而施及于四鄰其受五等之爵而被七命之服也可謂無愧而有光輝矣願侯益脩其實以充其名上以副天子之意而下以塞吏民之望民其奉事有進而無衰矣尚饗

謝雪祝文

徐州

天不吝澤神不忘職胡為水旱吏則不德失政名災莫

知自刻雨則號晴旱則謁雪神既不譴又滿其欲四山
暮霞萬瓦晨白驅攘疫癘甲折彘麥牲酒匪報維以告
潔神食無愧吏則慚慄尚饗

祭風伯雨師祝文

自秋不雨以至于今夏田將空秋種不入天子命我禱
于羣望雲物既合風輒散之吏民皇皇不知所獲罪敢
以薄奠訴于有神風若不作雨則隨至當以牲幣報神
之賜若格絕天澤棄民乏祀上帝臨視神其不然尚饗

謁文宣王廟祝文 湖州

竊惟吏治以仁義為本教化為急故以視事之三日祇見于先聖先師問所當先於學其所從來尚矣敢忘其舊尚饗

謁諸廟祝文

軾猥以不肖來長此邦實與有神分職幽明謹以視事之三日祇見于廟惟神保佑斯民俾風雨時若疫癘屏息吏既免罪神亦不愧尚饗

謁廟祝文 杭州

軾以王命來守此邦事神養民敢不祇飭莅政之始見
于祠下安靜無事豐樂有年惟神相之使免罪戾尚饗
謁文宣王廟祝文

軾以諸生誤蒙選擢昔自太史通守此邦今由禁林出
使浙右莅事之始祇見儒宮聖神臨之敢忘夙學尚饗
祭英烈王祝文

欽誦舊史仰瞻高風報楚為孝徇吳為忠忠孝之至實

與天通開塞陰陽斡旋濤江保障斯民以食此邦嗟我
蠢愚所向奇窮豈以其誠有請輒從庚子之禱海若伏
降完我岸闡千夫奏功牲酒薄陋報微施豐敬陳頌詩
侑此一鍾尚饗

祈雨祝文

杭州之為郡負山帶江水澤不留逾旬不雨農有憂色
挽州浚河公私告病吏既無術莫知所救不敢坐視惟
神之求庶幾閔民之窮赦吏之瀆賜以一雨敢忘其報

尚饗

謝雨祝文

舊穀不登陳廩已發稍失雨暘之節則懷溝壑之憂惟
神至明有禱必應敢陳薄奠少答殊私願推無倦之仁
以畢有年之賜尚饗

祈晴祝文

大雪連日凝陰傷春閔惟艱食之民重此常寒之虐役
兵墮指行旅摧輶老弱號呼吏既慚於無術陰陽舒卷

神何惜而不為願掃重雲以昭靈貺使民奉事永歲益
虔尚饗

謝晴祝文

軾以憂寄出守此邦歲之不登實任其咎政雖無術心
則在民惟神聰明其應如響雨不暴物晴不失時喜愧
之心吏民所共式陳菲薦少答神休尚饗

祈晴吳山廟祝文

秋穀未登既食其陳嗣歲之虞當斂其新逮此秋暘載

獲載春陰雨害之稽人罔功我發庫泉以實高廩曷救
雨官造止其淫既曠我場萬杵皆作待此抵京援我津
壑英文烈武雨霽在余稽首告病其忍弗圖尚饗

謝晴祝文

賞罰在朝吏申明之及其有愆吏得正之雨暘在天神
奉行之及其不時神得請之惟吏與神各率其職有求
必獲則無虛食淫雨既止惟神之功肴酒匪報惟以告
東尚饗

開湖祭禱吳山水仙五龍三廟祝文

杭之西湖如神之有目湖生芟葑如目之有翳翳久不治目亦將廢河渠有膠舟之苦鱗介失解網之惠六池化為胥井而千頃無復豐歲矣是用因賑卹之餘資興開鑿之利勢百日奏功所患者淫雨千夫在野所憂者疾癘庶神明之陰相與人謀而協濟魚龍前導以破堅菰葦解拆而迎銳復有唐之舊觀盡四山而為際澤斯民於無窮宜事神之益勵我將大合樂以為報豈徒用

尊酒之薄祭也尚饗

謝吳山水仙五龍三廟祝文

西湖堙塞積歲之患坐閱百吏熟視而歎惟愚無知妄
謂非難禱于有神陰假其便不愆于素成出幽贊大堤
雲橫老葑席卷歷時未幾功已過半嗣事告終來哲所
繕神卒相之罔咈民願肴酒之報我愧不腆尚饗

潁州謁文宣王廟祝文

軾以諸生遭遇入侍帷幄出典民社莅事之始祇見于

學先聖先師實臨之敬行所聞敢忘其舊尚饗

謁諸廟祝文

軾以侍臣出守承宣上意以民為本祇敬事神所以此
民蒞事之始祇見祠下尚饗

德音到州祭諸廟祝文

維年月日具位蘇軾謹以清酌庶羞之奠敢昭告于某
神上清儲祥宮成敷宥四海均福于下有詔守臣凡在
秩祀罔不祇薦維神導和却沴保民無疆以稱朝廷至

仁之意尚饗

祈雨迎張龍公祝文

維元祐六年歲次辛未十月丙辰朔二十五日庚辰龍
圖閣學士左朝奉郎知潁州軍州事蘇軾謹請州學教
授陳師道并遣承務郎迨以清酌庶羞之奠敢昭告于
昭靈侯張公之神稽首龍公民所祇威德博而化能潛
能飛食于潁人淮潁是依受命天子命服有輝為國庇
民凡請莫違歲早夏秋穀既微冬又不雨麥稿而腓

閔閔農夫望歲畏饑並走羣望莫哀我款於赫遺蛻靈
光照幃惠肯臨我言從其妃翻舞雩詠薦其潔肥雨雪
在天公執其機游戲俛仰千里一麾被及淮甸三輔王
畿積潤滂流決日不晞我率吏民鼓鐘旄旗拜送于郊
以華其歸尚饗

送張龍公祝文

維元祐六年歲次辛未十一月乙酉朔十日甲午龍圖
閣學士左朝奉郎知潁州軍州事兼管內勸農使輕車

都尉賜紫金魚袋蘇軾謹以清酌庶羞之奠敢昭告于
昭靈侯張公之神赫赫龍公甚武且仁赴民之急如謀
其身有不應祈惟汝不虔我自洗濯齋居誠陳早我之
罪勿移於民公顧聽之如與我言玉質金相其重千鈞
惠然肯來期者四人眷此行宮為留浹辰再雨一雪既
洽且均何以報之榜銘皆新詔公之德千億萬年惟師
道迨復餞公還咨爾庶邦益敬事神尚饗

立春祭土牛祝文

三陽既應庶草將興爰出土牛以戒農事丹青設象蓋
惟風俗之常耕獲待時必有陰陽之助仰惟靈德佑我
稽人尚饗

謝晴祝文

吏既不德致災病民一雨一霽輒號于神風回雪止農
事並作神則有功吏亦知忤凍餒之蘇其賜不貲嗟我
吏民為報之微尚饗

祈雨僧伽塔祝文

維元祐七年歲次壬申三月甲申朔十二日乙未龍圖閣學士左朝奉郎新知揚州軍州事充淮南東路兵馬鈐轄蘇軾謹以香燭茶果之供敢昭先于大聖普照王之塔淮東西連歲不稔農末皆病公私並竭重以浙右大荒無所仰食望此夏田以日為歲大麥已秀小麥已孕時雨不至垂將焦枯凶豐之決近在旬日軾移守廣陵所部十郡民窮為盜職所當憂才短德薄救之無由伏願大聖普照王以解脫力行平等慈憫欠雲雷咳唾

雨澤救焚拯溺不待崇朝敬瀝肝膽尚鑒聽之尚饗

定州謁諸廟祝文

惟皇上帝分命羣祀降釐下土惟我元后臨遣近臣鎮撫一方幽明雖殊保民惟均涖事之始祇見祠下若賦政疵類敢逃其罰雨暘以時疾疫不作亦竊有望于神尚饗

謁文宣王祝文

軾以諸生進位于朝入叅侍從出典方面涖事之始祇

見廟下居敬行簡以臨其民軾雖不敏請事斯語尚饗
北嶽祈雨祝文

維元祐九年歲次甲戌四月壬寅朔十六日丁巳端明
殿學士兼翰林侍讀學士左朝奉郎定州路安撫使兼
馬步軍都總管知定州軍州及管内勸農使輕車都尉
賜紫金魚袋蘇軾敢以制幣茶果清酌之奠敢昭告于
北嶽安天元聖帝都城以北燕薊之南既徂歲而不登
又歷時而未雨公私並竭農末皆傷麥將槁而未未生

民既流而盜不止豐凶之決近在浹辰溝壑之憂上貽
當宁仰止喬嶽食于朔方卷舒雲霓呼吸雨霽若其安
視小民之急何以仰符上帝之仁軾以短才謬膺重寄
儻有罪以致旱寧降罰于微躬今者得請于朝齋居
以禱旦夕是望吁夏而求雨我夏田兼致西成之富實
茲邊廩少寬北顧之憂拜賜以時敢忘其報尚饗

立春祭土牛祝文

敢昭告于勾芒之神木鐸傳音官師相儆土牛示候稼

穡將興敢徵福于有神庶保民於卒歲無作水旱以登
麥禾尚饗

春祈北嶽祝文

西起太行東屬碣石南至于河皆神所食吏謹刑政
農畢其力風雨時若則神之職方此東作敬薦其潔
錫之豐歲以昭靈德尚饗

春祈諸廟祝文

天既佑民必期于無害農惟望歲敢請于有神願疾沴

之不興庶風雨之時若敢忘舊典以報豐年尚饗

祈雨諸廟祝文

某神之靈去歲之秋民苦饑饉望此一麥以日為歲不
雨彌月敢以病告與其救之於已竭不若起之於未枯
敢冀有神時賜甘澤豐登之報我其敢忘尚饗

定州辭諸廟祝文

軾得罪于朝將適嶺表雖以謫去敢不告行區區之心
神所鑒聽尚饗

告文宣王祝文

嗟嗟元王三代之英言不鈎用於一君而為無窮之遺
教身不寵利於一時而有不朽之餘榮嗟嗟元王以道
而鳴肆筆成書吐辭為經炳然不渝言若丹青久而愈
盈聲非雷霆瞽者可以使別目以核視瞖者可以使抉
耳以聳驚奈何轍環天下卒老于行載空言於典籍示
後世之儀刑回狂瀾於既倒支大厦於將傾揭日月之昭
昭破陰氛之冥冥嗟乎一氣之委和與萬物之至精或

為淮夷之蠙珠或為雲漢之華星雖光輝之成彩未離
乎散聚以流形豈若王之道德愈久而彌明晔晔而華
涵涵而停融而在天者為雲漢之文章結而在地者為
山嶽之元靈詭然如龍翔鳳躍純乎玉振而金聲嗟嗟
元王德博難名某奉王命俯臨邊城畝有滯穗境無交
兵鳴玉載道紛袍在庭有踐籩豆有豐粢盛敢用昭薦
饗于克誠尚饗

告顏子祝文

志不行于時而能驅世以歸仁澤不加于民而能顯道以終身德無窮通古難其人惟公能之絕世離倫富貴不義視之如雲飲止一瓢不憂其貧受教孔子門人益親血食萬世配享惟神敢不昭薦公乎有聞

告五嶽祝文

相天以育物者五方之帝也配地以作鎮者五嶽之神也天為真君帝為真宰五嶽者三公之象也某叨受朝寄出守藩土神不虐罰民有豐歲敢用告誠以謝靈貺

秋賽祝文二首

惟神聰明為民依庇宜秩典祀欽奉靈祠況農事之肇
興賴神靈之降宥一拜蒙惠已膺風雨之時百里有嚴
將享秋冬之報

又

惟神光昭祀典幽贊化功享廟食以惟嚴垂介福而無
爽屬茲豐歲爰舉舊規式陳蠲潔之儀冀報有年之慶
杭州禱觀音祈晴祝文

三吳之災連歲不稔尚賴朝廷之澤大分倉廩之陳乃
眷疲羸僅免流殍今者淫雨彌月秋成半空永惟嗣歲
之憂將有流離之懼我大菩薩行平等慈觀此衆生皆
同赤子反雨暘於指顧化豐歉於斯須雖某等不德而
名災念斯民無辜而可憫願興慈率一極含生

謝觀音晴祝文

民無常心固何知於帝力天作淫雨當有感於佛慈慧
光照臨陰沴消復拯農工於溝壑寬吏責於簡書某等

共銜不報之恩願頌難名之德恭馳梵宇少薦微誠

祈晴祝文

常平之政覩歲美惡操其贏虛以馭農末秋穀未登已
食其陳嗣歲之虞當斂其新迨茲秋暘載獲載春陰雨
害之稽人罔功我發庫泉以實高廩盍勅雨官遏止其
淫既曠我場萬杵皆作待此抵京授我溝壑不顯大神
雨霽在予匪民焉依其忍弗圖

謝晴祝文

天作淫雨害于染盛蒙神之休猶得中蒸薄莫匪報式
昭厥誠

祈雨祝文

六月不雨乃時之常或霖或霽於稼則傷稼將有秋民
饑所望某也不德守此一方罪在守臣無俾民殃人不
能神易雨而暘神其聽之庶乎降康

謝雨祝文

竊以農事告成旱魃為沴浸罹焦爍之害遂稽收刈之

勤自非降靈大庇羣俗以下膏澤之賜庶有豐盈之期
實神助之使然豈愚誠之能致是用特臨神宇再款眸
容輒傾涓潔之誠仰答靈威之佑

祈雪霧猪泉祝文

噫嘻我民何辜于天不水則旱于今二年天未悔禍百
日不雨雪不斂塵麥不蓋土天子命我禱于山川側聞
此山神龍之淵躬拜稽首敢丐一勺得雪盈尺牲酒是
酌

祈雪祝文

水旱輒求惟吏之羞有求不倦惟神之休乙卯之雪膚寸而已如燔輿薪救以勺水嘉肴旨酒既謝且祈願終其賜盈尺為期

祭勾芒神祝文

夫帝出乎震神實輔之茲日立春農事之始將平秩於東作先恭授於人時乃出土牛以示早晚惟神其祐之春律既應農事將作爰出土牛以為耕候維爾有神實

左右之雨暘以時螟螣不作以克有年敢忘其報

祭佛陀波利祝文

積雪始消陰沴再作小民無辜弊于飢寒草木昆蟲悉
懼其虐並走羣望祈而未報意雨霽有數非神得專惟
我大士含法分無為不入塵數願以大解脫力作不可
思議事愍此無生豁然開明盡二月晦雨雪不作大拯
羸餓以發信根此大布施實無限量惟大士念之

祭常山神祝文

吏實不德無以導迎順氣消復災沴惟神之求神亦閔
其不才而嘉其勤凡有告請靡所不答乃者有謁乎神
即退之三日時雨周洽去城百里而近蝗獨不生凡我
吏民孰不歸德于神然而一雨之後彌月不繼百里之
外蛭生如初豈神之能應於前不能應於後能卹其近
不能卹其遠蓋吏不稱職政刑失中戾于民心以不能
終神之賜而我州之民比歲饑殍凋殘之餘不復堪命
若又不熟則流離之禍其莫知所止矣神之聰明其忍

以吏不稱職之所致而不卒救之歟今夏麥垂登而秋穀將稿若時賜霈澤驅攘蟲災以完我西成之資歲秋九月當與吏民復走廟下

祭泗州塔祝文

淮南東西連歲不稔士農皆病公私並竭重以浙右大荒無所仰食望此夏苗以日為歲大麥已秀小麥初孕時雨不至垂將焦枯豐凶之決近在旬日某移牧廣陵所部十郡民窮為盜吏職所憂才短德薄救之無術伏

願大聖普照王以解脫力行平等慈愷欠風雷咳唾雨
澤救焚拯溺不待崇朝敬瀝肝膽尚矜聽之

某上承府檄旁採民言供奉安輿願登法座伏願江海
貢潤龍天會朝布為三日之霖適副一邦之望

禱龍水祝文

雲布多峯日有焚空之勢雨無破塊人懷暘虐之憂雖
屢叩於明靈終未懷於通感府主舍人存心為國俯念
輿民燃香霽以禱祈對龍湫而懇望伏願明靈敷感使

雨澤以旁滋聖化荐臻致田疇之益濟

祈晴祝文

均糴之法著于甲令視歲豐凶以馭重輕歲且中熟雨
則害之如此失時公私交病神食此土民命係焉無俾
歟荒以作神羞

偈二十首

靈感觀音偈

并引

或問居士佛無不在云何僧榮所常供養觀世音像獨

稱靈感居士答言譬如靜夜天清無雲我目無病未有
舉頭而不見月今此畫像方其畫時工適清淨又此僧
榮方供養時秉心端嚴不入諸相無有我人衆生壽者
則觀世音廓然自現爾時居士作此言已心開形解隨
其所得而說偈言

夫物芸芸各升其英為天蒼蒼為日月星無在不在容
光則明矧我大士淵兮淨神妙湛生光即光為形亭亭
空中靡所倚憑眷此幻身如鬼如氓生則囿物軒昂權

衡地所不載而能空行滅則蕩空附離四生不可控搏
矧此亭亭涕淚請救搏頰頓纓如月下照著心寒清不
因脩為得法眼淨碎身微塵莫報聖靈

無名和尚頌觀音偈

徐因饒
州人

我觀諸佛及菩薩皆以六塵作佛事雖有妙智如觀音
根性亦自聞思復佛子流蕩無始劫未空言語文字性
譬如多財石季倫知財為害不早散手揮金寶棄溝壑
不如施與貧病者纍纍三百五十珠持與觀音作纓絡

送壽聖聽長老偈

并序

佛說作止任滅是謂四病如我所說亦是諸佛四妙法
門我今亦作亦止亦任亦滅滅則無作作則無止止則
無任任則無滅是四法門更相掃除火出木盡灰飛煙
滅如佛所說不作不止不任不滅是則滅病否即任病
如我所說亦作亦止亦任亦滅是則作病否即正病我
與佛說既同是法亦同是病昔維摩詰默然無語以對
文殊而舍利佛亦復默然以對天女此二人者有何差

別我以是知苟非其人道不虛行時長老聰師自筠來
黃復歸於筠東坡居士為說偈言

珍重壽聖師聽我送行偈願閱諸有情不斷一切法人
言眼睛上一物不可住我謂如虛空何物住不得我亦
非然我而不然彼義然則兩皆然否則無然者

朱壽昌梁武懺贊偈

并序

我觀世間諸得道者多因苦惱苦惱之極無所告訴則
呼父母父母不聞仰而呼天天不能救則當歸命於佛

世尊佛以大悲方便開示令知諸苦以愛為本得愛則喜犯愛則怒失愛則悲傷愛則懼而此愛根何所從生展轉觀察愛盡苦滅得安樂處諸佛亦言愛別離苦父母離別其苦無量於離別中生離最苦有大長者曰朱壽昌生及七歲而母捨去長大懷思涕泣追求刺血寫經禮佛懺悔四十餘年乃見其母念報佛恩欲度衆苦觀諸教門切近周至莫如梁武所說懺悔文既繁重旨亦淵秘一切衆生有不能了乃以韻語諧諸音律使一

切人歌詠讚歎獲福無量時有居士蜀人蘇軾見聞隨喜而說偈曰

長者失母常自念言母本生我我生母去有我無母不
如無我誓以此身出生入死母若不見我亦隨盡在衆
人中猶如狂人終日皇皇四十餘年乃見其母我初不
記母之長短大小肥瘠云何一見便知是母母子天性
自然冥契如磁石鍼不謀而合我未見母不求何獲既
見母已即無所求諸佛子等歌詠懺文既懺罪已當求

佛道如我所說作求母觀

玉石偈

嘻嘻呀呀三伏中草木生煙地生火遺君玉石百有八
願君置之白石盆注以碧蘆井中泉遣君肝肺涼如水
執惱既除心自定當觀熱相無去來寒至折膠熱流金
是我法身一呼吸寒人者冰熱者火冰火初不自寒熱
一切世間我四大畢竟誰受寒熱者願以法水浸摩尼
當觀此石如瓦礫

地獄變相偈

我聞吳道子初作鄴都變都人懼罪業兩月罷屠宰此
畫無實相筆墨假合成譬如說食飽何從生怖汗乃知
法界性一切惟心造若人了此言地獄自破碎

十二時中偈

十二時中常切覺察遮箇是什麼十二月二十日自洒
守席上回忽然夢得箇消息乃作偈曰

百滾油鐺裏恣把心肝爍遮箇在其中不寒亦不熱似

則是似則未是不唯遮箇不寒熱那箇也不寒熱咄甚
叫做遮箇那箇

無相庵偈

出庵見庵入庵見圓問此圓相何所因起非土非木亦
非虛空求此圓相了不可得乃至無有無有亦無是中
有相名大圓覺是佛心也是諸魔種

送海印禪師偈

海印禪師紀公將赴峨眉往別太子少保趙公於三衢

公以三詩贈行復枉道過某於齊安亦求一偈公以元
臣大老功成而歸某以非才竊祿得罪而去禪師道眼
了無分別迺知法界海惠照了萬殊大小從橫不相留
礙直從巴峽逢僧晏道到東坡別紀公當時半破峨眉
月還在平羌江水中請以此偈附于三詩之末

南屏激水偈

水激之高如所從來屈伸杓報盡而止止不先平於以
觀法

觀藏真畫布袋和尚像偈

拄杖指天布袋著地掉却數珠好一覺睡

木峰偈

元豐七年臘月朔日東坡居士過臨淮謁普照王塔過
襄師房觀所藏佛骨舍利捨山木一峯供養乃說偈言
枵然無根生意永斷劫火洞然為君作炭

寒熱偈

今歲大熱八十餘日物我同病是熱非虛方其熱時謂

不復涼及其既涼熱復安在凡此寒熱更相顯見熱既無有涼從何立今我又復認此為涼後日更涼此還是熱畢竟寒熱為無為有如此分別皆是衆生客塵浮想以此為達無有是處使謂為迷則又不可如火燒木從木成炭從炭成灰為灰不已了無一物當以此偈更問子由僕在黃州戲書為江夏李樂道持去後七年復相見京師出此書茫然如夢中語也元祐戊辰六年三月

三日

佛心鑑偈

軾第三子過蓄烏銅鑑圍徑數寸光明洞澈元豐八年十一月二日游登州延洪禪院院僧文泰方造釋迦丈像乃捨為佛心鑑且說偈云

鑒中面像熱時炎無我無造無受者心花發明照十方還度如是常沙衆

戲答佛印偈

百千燈作一燈光盡是恒沙妙法王是故東坡不敢惜

借君四大作禪牀

養生偈

閑邪存誠練氣養精一存一明一練一清清明乃極丹
元乃生坎離乃交梨棗乃成中夜危坐服此四藥一藥
一至到極則處幾費千息閑之廓然存之卓然養之郁
然煉之赫然守之以一成之以久功在一日何遲之有
易曰閑邪存其誠詳味此字知邪中有誠無非邪者
閑亦邪也至於無所閑乃見其誠者幻滅滅故非幻

不減

送僧應託偈

蘇壽明巢穀僧應託與東坡居士皆眉人也曾于黃岡將之廬山作偈送之

一般口眼兩般腸肚認取鄉人聞早歸去

王晉卿前生圖偈

王晉卿得破墨三昧又嘗聞祖師第一義故畫邢和璞房次律論前生圖以寄其高趣東坡居士既作破琴詩

記夢異矣復說偈言


前夢後夢真是一此幻彼幻非有二正好長松水石間
更憶前身後身事

東坡居士過龍光求大竹作肩輿得兩竿時南
華珪首座方受請為此山長老乃留一偈院
中須其至授之以為他時語錄中第一問

斫得龍光竹兩竿持歸嶺北萬人看竹中一滴曹溪水
漲起西江十八灘

南華長老寵示四頌事忙只還一偈

宿業相纏四十年常行八棒十三禪
今著衲衣歸玉局
可憐化作五通仙



東坡全集卷九十九

欽定四庫全書

集部

東坡全集卷一百一

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官修撰臣吳錫齡

謄錄監生臣蔡本任

欽定四庫全書

東坡全集卷一百

宋 蘇軾 撰

雜文一十八首

明正

送于叔失官東歸

世俗之患患在悲樂不以其正非不以其正其所取以
為正者非也請借子以明其正子之失官有為子悲如
子之自悲者乎有如子之父兄妻子之為子悲者乎子
之所以悲者惑於得也父兄妻子之所以悲者惑於愛

也惟不與於己者則不惑亦不悲夫惑則悲不惑則不
悲人宜以惑者為正歟抑將以不惑者為正歟以不惑
者為正則不悲者正也然子亦有所樂者曰吾之所以
為吾者豈以是哉雖失是其所以為吾者猶存則吾猶
可樂焉已而不樂又從而悲之則亦不忍夫天下之凡
愛我者之悲而不釋夫天下之凡惡我者之喜也夫愛
我而悲惡我而喜是知我之粗也樂其所以為吾者存
是自知之深也人不以自知之深為正而以知我之粗

者為正是得為正也歟故吾願為子言其正子將終自
樂而不悲詩云優哉游哉聊以卒歲

慎改竄

近世人輕以意改書鄙淺之人好惡多同故從而和之
者衆遂使古書日就訛舛深可忿疾孔子曰吾猶及史
之闕文也自予少時見前輩皆不敢輕改書故蜀本大
字書皆善本蜀本莊子云用志不分乃疑於神此與易
陰疑於陽禮使人疑汝于夫子同今四方本皆作凝陶

潛詩採菊東籬下悠然見南山採菊之次偶然見山初不用意而境與意會故可喜也今皆作望南山杜子美云白鷗沒浩蕩萬里誰能馴蓋滅沒於烟波間耳而宋敏求謂予云鷗不善沒改作波字二詩改兩字便覺一篇神氣索然也

捨銅龜子文

蘇州報恩寺重造古塔諸公皆捨所藏舍利予無舍利可捨獨捨盛舍利者敬為四恩三有捨之故人王頤為

武功宰長安有脩古塔者發舊葬得之以遺予予以
藏私印成壞者有形之所不免而以藏舍利則可以久
存藏私印或以速壞貴舍利而賤私印樂久存而悲速
壞物豈有是哉予其并捨之

日喻

生而眇者不識日問之有目者或告之曰日之狀如銅
槃扣槃而得其聲他日聞鐘以為日也或告之曰日之
光如燭捫燭而得其形他日揣籥以為日也日之與鐘

籥亦遠矣而眇者不知其異以其未嘗見而求之人也
道之難見也甚于日而人之未達也無以異於眇達者
告之雖有巧譬善導亦無以過於槃與燭也自槃而之
鐘自燭而之籥轉而相之豈有既乎故世之言道者或
即其所見而名之或莫之見而意之皆求道之過也然
則道卒不可求歟蘇子曰道可致而不可求何謂致孫
武曰善戰者致人不致於人子夏曰百工居肆以成其
事君子學以致其道莫之求而自至斯以為致也歟南

方多没人日與水居也七歲而能涉十歲而能浮十五而能沒矣夫沒者豈苟然哉必將有得於水之道者日與水居則十五而得其道生不識水則雖壯見舟而畏之故北方之勇者問於没人而求其所以沒以其言試之河未有不溺者也故凡不學而務求道者北方之學沒者也昔者以聲律取士士雜學而不志於道今者以經術取士士求道而不務學渤海吳君彥律有志於學者也方求舉於禮部作日喻以告之

問養生

余問養生於吳子得二言焉曰和曰安何謂和曰子不見天地之為寒暑乎寒暑之極至於折膠流金而物不以為病其變者微也寒暑之變晝與日俱逝夜與月並馳俯仰之間屢變而人不知者微之至和之極也使此二極者相尋而狎至則人之死久矣何謂安曰吾嘗自牢山浮海達于淮遇大風焉舟中之人如附於桔槔而與之上下如蹈車輪而行反逆眩亂不可止而吾飲食

起居如他日吾非有異術也惟莫與之爭而聽其所為
故凡病我者舉非物也食中有蛆人之見者必嘔也其
不見而食者未嘗嘔也請察其所從生論八珍者必噉
言糞穢者必唾二者未嘗與我接也唾與噉何從生哉
果生於物乎果生於我乎知其生於我也則雖與之接
而不變安之至也安則物之感我者輕和則我之應物
者順外輕內順而生理備矣吳子古之靜者也其觀於
物也審矣是以私識其言而時省觀焉

怪石供

禹貢青州有鉛松怪石解者曰怪石石似玉者今齊安江上往往得美石與玉無辨多紅黃白色其文如人指上螺清明可愛雖巧者以意繪畫有不能及豈古所謂怪石者耶凡物之醜好生於相形吾未知其果安在也使世間石皆若此則今之凡石復為怪矣海外有形語之國口不能言而相喻以形其以形語也捷於口使吾為之不己難乎故夫天機之動忽焉而成而人真以為

巧也雖然自禹以來怪之矣齊安小兒浴於江時有得之者戲以餅餌易之既久得二百九十有八枚大者兼寸小者如棗栗菱芡其一如虎豹首有口鼻眼處以為羣石之長又得古銅盆一枚以盛石挹水注之粲然而廬山歸宗佛印禪師適有使至遂以為供禪師嘗以道眼觀一切世間混淆空洞了無一物雖夜光尺璧與瓦礫等而況此石雖然願受此供灌以墨池水強為一笑使自今以往山僧野人欲供禪師而力不能辦衣服飲

食卧具者皆得以淨水注石為供蓋自蘇子瞻始時元豐五年五月黃州東坡雪堂書

後怪石供

蘇子既以怪石供佛印佛印以其言刻諸石蘇子聞而笑曰是安所從來哉予以餅易諸小兒者也以可食易無用予既足笑矣彼又從而刻之今以餅供佛印佛印必不刻也石與餅何異參寥子曰然供者幻也受者亦幻也刻其言者亦幻也夫幻何適而不可舉手而示蘇

子曰拱此而揖人人莫不喜戟此而詈人人莫不怒同是手也而喜怒異世未有非之者也子誠知拱戟之皆幻則喜雖存而根亡刻與不刻無不可者蘇子大笑曰子欲之耶乃亦以供之凡二百五十并二石槃云

太息送秦少章

孔北海與曹公論盛孝章云孝章實丈夫之雄者也游談之士依以成聲今之少年喜謗前輩或譏評孝章孝章要為天下重名九牧之人所共稱歎吾讀至此未嘗

不廢書太息也曰嗟乎英偉竒逸之士不容於世俗也
久矣雖然自今觀之孔北海盛孝章猶在世而向之譏
評者與草木同腐久矣昔吾舉進士試於禮部歐陽文
忠公見吾文曰此我輩人也吾當避之方是時士以剽
裂為文聚而見訕且訕公者所在成市曾未數年忽然
若潦水之歸壑無復見一人者此豈復待後世哉今吾
衰老廢學自視缺然而天下士不吾棄以為可以與於
斯文者猶以文忠公之故也張文潛秦少游此兩人者

士之超逸絕塵者也非獨吾云爾二三子亦自以為莫及也士駭於所未聞不能無異同故紛紛之言常及吾與二子吾策之審矣士如良金美玉市有定價豈可以愛憎口舌貴賤之歟少游之弟少章復從吾游不及朞年而論議日新若將施於用者欲歸省其親且不忍去嗚呼子行矣歸而求諸兄吾何如焉作太息一篇以餞其行使藏于家三年然後出之

藥誦

嵇中散作幽憤詩知不免矣而卒章乃曰采薇山阿散
髮巖岫永嘯長吟願性養壽者悼此志之不遂也司馬
景王既殺中散而悔使悔於未殺之前中散得免於死
者吾知其掃迹滅景於人世如脫兔之投林也采薇散
髮豈其所難哉孫真人著大風惡疾論曰神仙傳有數
十人皆因惡疾而得仙道何者割棄塵累懷潁陽之風
所以因禍而取福也吾始得罪遷嶺表不自意全既逾
年無後命知不死矣然舊苦痔至是大作呻呼幾百日

地無醫藥有亦不效道士教吾去滋味絕薰血以清淨
勝之痔有蟲館於吾後滋味薰血既以自養亦以養蟲
自今日以往旦夕食淡麩四兩猶復念食則以胡麻伏
苓麩足之飲食之外不啖一物主人枯槁則客自棄去
尚恐習性易流故取中散真人之言對病為藥使人誦
之日三曰東坡居士汝忘逾年之憂百日之苦乎使汝
不幸而有中散之禍伯牛之疾雖欲採薇散髮豈可得
哉今食麻麥伏苓多矣居士則歌以荅之曰事無事之

事百事治兮味無味之味五味備兮伏苓麻麥有時而
匱兮有則食無則已者與我無既兮嗚呼噫噫館客不
終以是為愧兮

補龍山文

并引

丙子重九客有言桓溫龍山之會風吹孟嘉帽落溫遣
孫盛嘲之嘉作解嘲文辭超卓四坐歎伏恨今世不見
此文予乃戲為補之曰

征西天府重九令節駕言龍山燕飢羣哲壺歌雅奏緩

帶輕恰胡為中鴈一笑粲發椶楠競秀榆柳獨脫驥騄
交驚鴛蹇先蹶楚狂醉亂隕帽莫覺戎服囚首枯顛茁
髮維明將軍度量闊達容此下士顛倒冠鞵宰夫揚觶

兕觥舉罰請歌相鼠以侑此爵

右
嘲

吾聞君子蹈常履素晦明風雨不改其度平生丘壑散
髮箕踞墜車天全顛沛何懼腰適忘帶足適忘履不知
有我帽復奚數流水莫繫浮雲暫寓飄然隨風非去非
取我冠明月被服寶璐不纓而結不簪而附歌詩寧擇

請歌相鼠罰此陋人俾出童殺

右解
嘲

東坡酒經

南方之氓以糯與粳雜以卉藥而為餅嗅之香嚼之辣
揣之朽然而輕此餅之良者也吾始取麩而起肥之和
之以薑液蒸之使十裂繩穿而風戾之愈久而益悍此
麩之精者也米五斗以為率而五分之為三斗者一為
五升者四三斗者以釀五升者以投三投而止尚有五
升之羸也始釀以四兩之餅而每投以二兩之麩皆澤

以少水取足以散解而勻停也釀者必甕按而并泓之三日而并溢此吾酒之萌也酒之始萌也甚烈而微苦蓋三投而後平也凡餅烈而麴和投者必屢嘗而增損之以舌為權衡也既溢之三日乃投九日三投通十有五日後定也既定乃注以斗水凡水必熟而冷者也凡釀與投必寒之而後下此炎州之令也既水五日乃筭得二斗有半此吾酒之正也先筭半日取所謂羸者為粥米一而水三之揉以餅麴凡四兩二物并也投之

糟中熟潤而再釀之五日壓得斗有半此吾酒之少勁者也勁正合為四斗又五日而飲則和而力嚴而不猛也筋絕不旋踵而粥投之少留則糟枯中風而酒病也釀久者酒醇而豐速者反是故吾酒三十日而成也

罪言

吾聞肉食之憂非藿食者所宜慮也府居之謀非巷居者所宜慮也分之所不及義之所弗出也義之所弗出利之所不釋也犯義者惑維卒不自克作罪言萬夫之

望萬夫所依匪才尚之而量包之丘山之憾一笑可散
芥蒂之讐千河不収嗚呼寧汝容汝豈汝不可神之聽
之終和而同乎乘人之氣決人易耳解忤觸猜是惟艱
哉水激則旱其傷淫夷矢激則遠行將安追嗚呼佐涉
者湍佐鬪者呼柴不立其愚乃可以須愛心之偏其辭
溢妍惡心之厚其辭溢醜惟仁人之言愛惡兩捐廣大
恬愉上通于天嗚呼善言未升貧客瞰門曷以壽我公
侯承之天道好還莫適後先人事喜復無常倚伏前之

所是事定而偷今之所是後當焉如嗚呼禍不在先亦不在人還隱其心有萬其全疾惡過義美惡易位矯枉過直美惡同則如食宜餽饜則為度如酌孔取劇則荒舞嗚呼乃陰乃陽神理所藏一弛一張人道之常

論文

吾文如萬斛泉源不擇地皆可出在平地滔滔汨汨雖一日千里無難及其與石山曲折隨物賦形而不可知也所可知者常行于所當行常止于不可不止如是而

已矣其他雖吾亦不能知也

記講筵

秘書監侍講傅堯俞始召赴資善堂對迺英閣堯俞致謝上遣人宣召曰卿以博學參預講筵宜尊所聞以輔不逮堯俞講畢曲謝上復遣人宣諭卿講義淵博多所發揮良深嘉歎是日上讀三朝寶訓至天禧中有二人犯罪法當死真宗皇帝惻然憐之曰此等安知法殺之則不忍捨之則無以勵衆乃使人持去笞而遣之以斬

訖奏又祀汾陰日見一羊自擲道左怪問之曰今日尚
食殺其羔真宗慘然不樂自是不殺羊羔資政殿學士
韓維讀畢因奏言此特真宗皇帝小善耳然推其心以
及天下則仁不可勝用也真宗自澶淵之役却敵之後
十九年不言兵天下富其源蓋出于此昔孟子論齊王
不忍殺觥觶之牛以為是心足以王今恩足以及禽獸
而不及于百姓豈不能哉蓋不為耳外人皆云皇帝陛
下仁孝發于天性每行見昆蟲螻蟻違而過之且勅左

右勿踐履此亦仁術也臣願陛下推此心以及百姓則天下幸甚某時為右史奏曰臣今日十五日侍邇英殿竊見資政殿學士韓維因讀三朝寶訓至真宗皇帝好生惡殺因論皇帝陛下在宮中不忍踐履螻蟻其言深切可以推明聖德益增福壽臣忝備位右史謹書其事於冊又錄一本上進意望陛下采鑒無忘此心以廣好生之德臣無任大願

天華宮

天華宮在羅浮山之西蘇軾曰南漢主建有甘露羽蓋
等亭雲華閣命中書舍人鍾有章作記初南漢主夢神
人指羅浮山之西去延祥寺西北有兩峰相疊一洞對
流可以為宮訪之得其地又夢金龍起於宮所遂改為
黃龍洞此地即葛仙西庵至宋朝革命四方僭叛以次
誅服劉氏懼焉將欲潛遁羅浮為狡兔之穴又命於增
江水口鑿濠通山往來山洞倉卒為航舟之計開寶四
年乃始歸命則知劉氏為寶宮於山間無事則為臨賞

之樂警急則為逋逃之所其計窘矣

錫杖泉

錫杖泉在羅浮寶積寺即景泰禪師卓錫之地亦謂之卓錫泉蘇軾曰予昔自汴入淮泛江泝漢歸蜀飲江淮水益彌年既至覺井水腥澁百餘日然後安之以此知江之甘於井也審矣予來嶺外自揚子江始飲江水及至南康江益清駛水益甘則又知南江賢於北江也近度嶺入清遠峽水色如碧玉味亦益勝今日遊羅浮酌

景泰禪師錫杖泉則清遠水又在下矣嶺外惟惠人喜
鬪茶此水不虛出也

白水山

白水山在象頭南蘇軾曰羅浮之東麓也有懸泉百仞
山八九折折處輒為潭深者絕石四五丈不能及旁有
巨人跡數十謂之佛跡巖巖西故有院亦曰佛跡

縣榜

先朝值邊庭懷服兵革寢息而又體質恭儉在位四十

有二年宮室苑囿無所益故民無暴賦橫徭而生齒歲
登墾田日廣至于法令則去苛慘尚寬簡守令則進賢
良退貪殘牛酒以禮高年粟帛以旌孝行廣惠以廩憚
獨寬恤以省力役除身丁之筭弛鹽榷之利故能道迎
休祥年穀登衍其裕民之德固已浹肌膚而淪骨髓矣
然猶慊然憂下民之疾痲無良劑以全濟於是詔太醫
集名方曰簡要濟衆凡五卷三策鏤板模印以賜郡縣
俾人得傳錄用廣拯療意欲錫以康寧之福躋以仁壽

之域已而縣與律令同藏殆逾一紀窮遠之民或莫聞
知聖澤壅而不宣吏之罪也乃書以方版揭之通會不
獨流傳民間痊疴愈疾亦欲人人知上恩也後之君子
儻不以是為誚歲一檢案之使無遺毀焉嘉祐七年正
月日

擬作二首

代侯公說項羽辭

并叙

漢與楚戰敗於彭城太公間走見獲於楚項羽常置軍

中以為質漢王遣辯士陸賈說項羽請之不聽後遣侯公羽許之遂歸太公侯公之辯過陸生矣而史闕其所
以說羽之辭遂探其事情以補之作代侯公說項羽辭
漢王四年遣辯士陸賈東說項王請還太公項羽弗聽
賈還漢王不懌者累日左右計無所出侯公在軍中而
未知名乃超進而言曰秦為無道荼毒天下戮人之父
刑人之子如刈草菅大王奮不顧身建大義除殘賊為
萬民請命今秦氏已誅天下且定民之父子室家皆得

保完以相守也其慶大矣宜與太公享萬歲無窮之歡
不幸太公拘於強讎以重大王夙夜之憂臣聞主憂臣
辱主辱臣死大王諸臣未有輸忠出奇以還太公之屬
車蹈義死節以折項羽之狼心者臣恐天下有以議漢
為無人矣此臣等之罪也臣願先即辱國之誅漢王嘻
噫曰吾惟不孝不武而太公暴露拘辱於楚者三年矣
吾重念天下大計未獲即死之此吾所以早夜痛心疾
首東嚮而不忘也願為之奈何侯公曰臣雖不敏願大

王假臣革車一乘騎卒十人臣朝馳至楚壁而暮與太公驂乘而歸可乎漢王慢罵曰腐儒何言之易也夫陸賈天下之辯士吾前日遣之智窮辭屈抱頭鼠竄顛狽而歸僅以身免若何言之易也侯公曰待人以必能者不能則喪氣倚事之必集者不集則挫心大王前日之遣賈也恃之為必能之人望之有必集之事今賈乃困辱而歸是大王氣喪而心挫也宜有以深鄙臣也且大王一失任於陸賈乃遂懲艾以為無足使令也者是大

王亦太公之無還期待天下為無事也漢王曰吾豈忘
親者耶顧若無足以辦此且項王陰懷不仁徒觸其鋒
與之俱靡耳侯公曰昔趙平原君苦秦之侵欲結楚從
也求其可與從適楚者二十人蓋擇於門下也食客數
千得十九焉其一人無得也最下客毛遂請行平原君
不擇而與之俱卒至強楚廷叱其王而定從於立談之
間者毛遂功也日者趙王武臣見獲於燕以其臣陳餘
張耳之賢擇人請王往者十輩無一返者終於養卒請

行朝炊未終乃與趙王同載而歸此大王之所知者臣
乃今日願為大王之毛遂養卒大王何憚不辱平原餘
耳之聽哉漢王曰善即飭車十乘騎卒百人以遣侯公
侯公至楚晨扣軍門謁項王曰臣聞漢王之父太公為
俘囚臣竊慶大王獲所以勝於漢者前日漢王遣使請
之而大王不與至將烹焉臣竊弔大王似不卹楚矣項
王嗔目大怒叱侯公曰若自薦死乃欲為而主行說以
僥倖也且吾親與人角而獲其父固將甘心焉今乃言

無鄙者何也侯公曰臣以區區之身備漢之使而有謁於大王故大王以臣為漢游說而忘忠楚也大王試幸聽之使其言有可用則楚漢之大利兩君之至歡豈臣之私幸也使其言無可用則臣徐蹈鼎鑊以從太公之烹蓋未晚也項王曰太公之不得歸必矣若將何言侯公曰夫漢王失職怏怏而西因思歸之士收豪傑之伍舉梁漢之師下巴蜀之粟并三秦定齊魏日引而東以與大王決一旦之命大王視其志固將一天下朝諸侯

建七廟定大號為萬世基業耶抑將區區狗匹夫之節
為曾參之孝而已者耶且連兵帶壘與楚百戰以決雌
雄乃有天下三分之二大王軍覆將死自救不暇凡所
以運竒決敵為大王之勅敵者在漢王與諸將了事耶
抑太公實為之也耶雖庸人孺子固知之然則太公獨
一亡似人耳不足為楚漢之輕重大王幸擄獲之而禍
福實係焉視其用之何如耳得所以用而用之者強失
所以用而用之者亡苟為失其所用未若不獲之為善

也大王所以久拘而不歸者固以要之誠是也且要而能致之則權在我要而不能致則權在人權之所在以戰必克則要者名也歸者實也大王苟不得志於名當速收效於實無為兩失而自遺其患是以臣竊為大王慎惜此舉也大王固嘗置之俎上而命之矣彼報之曰必欲烹之願分羹焉且父子相愛之情豈相遠哉方漢王寤於彭城二子同載推墮捐之弗顧也安知其視父不與子同也太公之囚楚者三年矣彼誠篤于愛父固

將捐兵解甲膝行頓顙楚之轅門為之請一旦之命今
勵士方力督戰方急無一日而忘與楚從事此其志在
天下無以親為也大王今不歸之以收其實將久留之
以執其名故曰似不卹楚也項王怒氣少息徐曰顧吾
所讎者漢王爾其父何與耶且漢王親以其身投吾掌
握者數矣我常易而釋之今乃曰東向必欲亡楚而後
已故吾深讎之欲蒞醢其父聊快於一時況與之歸耶
侯公曰辱大王幸賜聽臣臣請言其不可者夫首建大

義誅暴秦者惟楚世為賢明顯名於天下者惟楚天下
豪傑樂從而爭赴者惟楚披堅執銳為士卒先所向摧
靡莫如大王兵強將武百戰百勝莫如大王諸侯畏懼
惟所號令莫如大王割地據國連城數十莫如大王大
王持此數者以令天下朝諸侯建大號何待乎今然而
為之八年智窮兵敗土疆日促反為漢雌大王嘗自知
其所以失乎項王曰吾誠每不自知如公言焉公試論
吾所以失者侯公曰大王知夫博者事乎夫財均則氣

均氣均則敵偶然後勝負之勢決於一時今大王求與
漢博方布席徒手未及投地而驟以己資推遺之己而
財索氣竭徒手而校之則大王之勝勢去矣夫仁義禮
智所以取天下之資而制敵之具也大王乃棄資委具
以為無所事以故漢皆獲而收執之此所以自引而東
視大王如無也項王曰何謂棄資委具侯公曰夫秦民
之不聊生久矣漢王之入關也秋毫無所犯解秦之罟
約法三章民大慶悅惟恐其下王秦也大王之至燔燒

屠戮酷甚於秦秦人失望何以為仁大王始與諸侯受約懷王先入關者王之漢王出萬死不顧一生之計叩關決戰降俘其主以待大王而大王背約遷之南鄭何以為信大王以世為楚將方舉大義不立其後無以令天下遂共立懷王而稟聽之及天下且定乃陽尊為帝而放殺之何以為義以范增之忠陳平之智韓信之勇皆人傑爭天下者視此三人為之存亡然而增死於疑平信去而不用何以為智是以漢王於其入關也天下

歸其仁其還定三秦也天下歸其信為義帝縞素也天下歸其義其用平信也天下歸其智此四者大王素有之資可畜之具惟其委棄而不用故漢皆得而收執之是以大王未得所以稅駕也方今之勢漢王者高資富室也大王者窶人也天下者市人也市人不趨窶人而趨高資富室明矣然則大王今日之資恃有一太公爾天所以相楚也今不歸之以伸區區之信義紓旦夕之急臣恐漢人怒氣益奮戰士倍我是大王又以其資遺

漢且將索然而為窮人矣此臣所以為大王寒心也夫制人之與見制於人克人之與見克於人豈同日而語哉願大王熟計之項王曰孤所以恩漢者亦至矣然去輒背我今其父在此猶日急鬪誠一旦歸之徒益其氣爾侯公曰不然臣聞懷敵者強怒敵者亡大王於漢有足懷而制之乃欲怒而鬪之臣意天禍大王之東將遂孤楚矣大王誠惠辱一介之使護太公且致言漢王曰前日太公播越于外羈旅敵軍獲侍盥沐者三年于茲

而君王方深督過之是以下國君臣未敢議太公之歸
今君王勅駕迎之孤恐久稽君王旦暮問安侍膳之歡
敢不承令敬遣下臣衛送太公之屬車以還行宮孤亦
願自今之日與君王捐忿與瑕繼平昔之歡君王有以
報不穀者皇天后土實與聞之如此而漢不解甲罷兵
以答大義則曲在彼矣大王因之號令士卒以趨漢王
此秦所以獲晉惠公也今大王不辱聽臣臣無所受命
而歸漢王固將慟哭於軍曰楚之讎我者深矣使者再

返而太公不歸矣且號為舉大義除殘賊拯萬民終之
有不共戴天之讎何面目以視天下今日之事有楚無
漢有漢無楚吾將前死楚軍不返顧矣漢王持此感怒
士心整甲而趨楚軍此伍子胥所以鞭平王之屍也項
王曰善吾聽公姑無烹公第還語而王令罷兵吾今歸
之矣侯公曰此又不可夫智貴乎早決勇貴乎必為早
決者無後悔必為者無棄功王陵楚之驍將也一旦亡
去漢大王拘執其母將以還陵也而其母慷慨對使者

為陵陳去就之義勅陵無還遂伏劍而死故天下皆賢
智其母而莫不哀其死也今太公幽囚鬱抑於大王之
軍久矣今聞使者再返而大王無意幸赦還之臣竊意
其變生於無聊不勝恚辱之積一旦引決以蹈陵母之
義則大王悔恐自失雖欲回漢軍之鋒不可得矣臣聞
來而不可失者時也蹈而不可失者機也方今大王糧
匱師老無以支漢而韓信之軍乘勝之鋒亦且至矣大
王雖欲解而東歸不可得矣臣願大王因其時而用其

機急歸太公與漢王約中分天下割鴻溝以西為漢以東為楚大王解甲登壇建號東帝以撫東方之諸侯亦休兵儲粟以待天下之變漢王老且厭兵尚何求哉固將世為西藩以事楚矣項王大悅聽其計引侯生為上客召太公置酒高會三日而歸之太公呂后既至漢王大悅軍皆稱萬歲即日封侯公平國君曰此天下辯士所居傾國者故號平國君焉

擬孫權答曹操書

權白孟德足下辱書開示禍福使之內殺子布外擒劉
備以自効書辭勤款若出至誠雖三尺童子亦曉然知
利害所在矣然僕懷固陋敢略布昔田橫齊之遺虜漢
高祖釋酈生之憾遣使海島謂橫來大者王小者侯猶
能以力自剄不肯以身辱於劉氏韓信以全齊之地束
手於漢而不能死於牖下自古同功一體之人英雄豪
傑之士世亂則藉以剪伐承平則理必猜疑與其受韓
信之誅豈若死田橫之節也哉僕先將軍破虜遭漢陵

夷董卓僭亂焚燒宗廟發掘陵寢故依袁術以舉義師
所指城邑響應天下思得董卓而食之不厭不幸此志
未遂而無祿早世先兄伯符嗣命馳驅鋒鏑周旋江漢
豈有他哉上以雪天子之恥下以畢先將軍之志耳不
意袁術亦僭位號污辱義師又聞諸君各盜名字伯符
提偏師進無所歸退無所守故資江東為之業耳不幸
有荆軻舞陽之變不以權不肖使統士卒以卒先臣之
志僕受遺以來卧薪嘗膽悼日月之逾邁而歎功名之

不立上負先臣未報之忠下忝伯符知人之明且權先
世以德顯於吳權若效諸君有非常之志縱不蒙顯戮
豈不墜其家聲耶漢自桓靈以來上失其道政出多門
宦官之亂纒息董卓之禍復興催汜未誅袁劉割據天
下所恃惟權與公及劉備三人耳比聞卓已鯨鯢天子
反正僕意公當掃除餘孽同獎王室上助天子與宗廟
社稷之靈退守藩國無失春秋朝覲之節而足下乃有
欺孤之志威挾天子以令天下妄引歷數陰構符命昔

笑王莽之愚今竊歎足下蹈覆車也僕與公有婚姻之
舊加之同好相求然自聞求九錫納椒房不惟同志失
望天下甚籍籍也劉備之兵雖少然僕觀其為人雄材
大畧寬而有容拙於攻取巧於馭人有漢高祖之餘風
輔以孔明未可量也且以忠義不替曩昔僕以為今海
內所望惟我二人耳僕之有張昭正如備之孔明左提
右挈以就大事國中文武之事盡以委之而見教殺昭
與備僕豈病狂也哉古諺有之輔車相依唇亡齒寒僕

與劉備實有唇齒相須之勢足下所以不能取武昌又不能到成都者吳蜀皆存也今使僕取蜀是吳不得獨存也蜀亡吳亦隨之矣晉以垂棘屈產假道於虞以伐虢夫滅虢是所以取虞虞以不知故及禍足下意何以異此古人有言曰白首如新傾蓋如故言以身託人必擇所安益德視僕豈惜此尺寸之土者哉特以公非所託故也荀文若與公共起艱危一旦勸公讓九錫意便憾使卒憂死矧僕與公有赤壁之隙雖復盡釋前憾然

敢必公不食斯言乎今日歸朝一匹夫耳何能為哉縱
公不見害交鋒兩陣之間所殺過當今其父兄弟實
在公側怨讎多矣其能安乎季布數窘漢王及即位猶
下三族之令矧足下記人之過忘人之功不肯忘文若
於九錫其肯赦僕於赤壁乎孔文舉與楊德祖海內奇
士足下殺之如皂隸豈復有愛于權天下之才在公右
者即害之矣一失江東豈容復悔耶甘言重幣幸勿復
再

東坡全集卷一百